

Wizara ya Kilimo kupitia Wakala wa Mbegu za Kilimo (ASA) kusambaza tani 2,045 za mbegu bora zilizothibitishwa

06 Jan 2024 - Habari na Matukio - 9



Naibu Waziri wa Kilimo, Mhe. David Silinde (Mb) amezindua usambazaji wa mbegu za ruzuku za Alizeti kwa wakulima katika msimu wa 2023/24. Zoezi la uzinduzi huo limefanyika leo Januari 03, 2024 Mkoani Singida.

Wizara ya Kilimo kupitia Wakala wa Mbegu za Kilimo (ASA) inatarajia kusambaza jumla ya tani 2,045 za mbegu bora zilizothibitishwa ubora wake; ikijumuisha tani 700 za mbegu chotara ambazo zinaingizwa kutoka nje ya nchi pamoja na tani 625.4 ambazo zitapatikana kutoka kwa makampuni binafsi ndani ya nchi.

Aidha, usambazaji wa mbegu bora kwa mfumo wa ruzuku umeongeza uzalishaji wa Alizeti nchini ambapo kwa msimu huu wa 2023/24 uzalishaji wa Alizeti umefikia tani 1,100,000 ikiwa ni ongezeko kutoka tani 400,000 zilizovunwa mwaka jana 2022/23.

“Serikali inatambua gharama za uzalishaji na usambazaji mbegu na changamoto ya mbegu kuwafikia wakulima kwa wakati kupitia Halmashauri mbalimbali. Hivyo, kupitia Wakala wa Mbegu za Kilimo, Wizara ya Kilimo itahakikisha kunakuwa na utaratibu mzuri ili Mbegu ziwafikie wakulima,” amesema Mhe. Silinde.

Mhe. Silinde pia ametoa rai kwa wakulima kutumia mbegu bora ili kuongeza tija katika uzalishaji wa zao la Alizeti.